

KERATAN AKHBAR

TARIKH : 19 OGOS 2023
AKHBAR : BERITA HARIAN
MUKA SURAT : 22

Rangka kerja tunjang susun semula ekonomi negara

Pengumuman KDNK suku kedua 2023

Rangka kerja tunjang susun semula ekonomi negara

Kerajaan fokus pertumbuhan berkualiti inklusif, mampan jangka masa panjang

Oleh Mahanum Abdul Aziz dan Alzahrin Alias
bbbiz@nstp.com.my

Wadah Ekonomi MADANI akan menjadi induk kepada penstrukturan semula secara menyeluruh ekonomi Malaysia dalam jangka masa panjang.

Gabenor Bank Negara Malaysia (BNM), Datuk Shaik Abdul Rasheed Abdul Ghaffour, berkata ketika ini banyak pihak hanya memberi tumpuan kepada pertumbuhan Keluaran Dalam Negara Kasar Negara (KDNK) sebagai tajuk utama, tetapi tidak menyentuh langkah perkembangan masa hadapan.

Justeru, beliau berkata, adalah penting untuk Malaysia mula memberi tumpuan kepada pertumbuhan berkualiti yang inklusif dan mampan pada jangka masa panjang.

"Rangka kerja Ekonomi MADANI akan menjadi teraju utama penyusunan semula ekonomi negara dan mencapai sasaran.

"Dalam rangka kerja ini, ekonomi Malaysia akan melihat transformasi pelbagai perkara utama," katanya pada sidang media bersama Bank Negara Malaysia (BNM) dan Jabatan Perangkaan Malaysia (DOSM) mengumumkan prestasi KDNK suku kedua 2023 di Kuala Lumpur, semalam.

Perincian lanjut mengenai Eko-



Ekonomi MADANI bantu perkukuh lagi pasaran buruh. (Foto hiasan)



nomi MADANI dijangka akan turut disentuh oleh Perdana Menteri, Datuk Seri Anwar Ibrahim dalam pembentangan Kajian Separuh Penggal Rancangan Malaysia Ke-12 (RMKe-12) di Parlimen pada 11 September ini.

Pelembagaan sektor perindustrian
Abdul Rasheed berkata, transformasi yang digariskan dalam Ekonomi MADANI seperti menggiatkan semula sektor perindustrian disokong oleh pelaburan berkualiti yang mewujudkan pekerjaan berkualiti dan bergaji tinggi.

Beliau berkata, ia juga membo-

lehkan Malaysia mencapai ekonomi berdaya tahan iklim dan lebih hijau serta penambahbaikan tabir urus fiskal.

"Ia turut membawa kepada ketelusan yang kemudian mampu meningkatkan keyakinan pelabur dan penarafan agensi kredit," katanya.

Beliau berkata, antara inisiatif utama untuk memacu pertumbuhan itu, termasuk Pelan Induk Perindustrian Baharu 2030 (NIMP 2030), Pelan Hala Tuju Peralihan Tenaga Negara (NETR) dan pembentangan Akta Tanggungjawab Fiskal (FRA).

"Pada jangka masa pendek, kita boleh menjangkakan untuk melihat sokongan positif kepada pertumbuhan daripada pelaksanaan beberapa projek pemangkin penting di bawah NETR," katanya.

Abdul Rasheed berkata, Ekonomi MADANI juga akan membantu pengukuhan pasaran buruh negara yang terus bertambah baik suku kedua tahun ini dengan kadar pengangguran menurun kepada 3.4 peratus pada Jun lalu didorong pertumbuhan guna tenaga yang stabil.

Katanya, segmen yang terdedah seperti wanita dan belia juga pulih ke tahap sebelum pandemik COVID-19.

"Bagaimanapun, masih terdapat ruang untuk penambahbaikan seperti penyertaan dalam kalangan buruh wanita masih rendah.

"Penyertaan lebih besar peratusan buruh wanita ini juga satu daripada bidang tumpuan rangka kerja ekonomi MADANI," katanya.

Abdul Rasheed berkata, keadaan pembiayaan yang menyokong dan penerusan projek baharu serta sedia ada akan turut menyokong pertumbuhan pelaburan pada 2023.

Beliau berkata, pertumbuhan negara terus disokong aktiviti pelaburan dengan pembiayaan untuk modal perbelanjaan masih akan datang, begitu juga dengan niat pelaburan.

"Melangkah ke hadapan, ekonomi mendapat manfaat daripada realisasi pelaburan baharu dan projek sedia ada, terutama infrastruktur mega.

"Kemajuan pelaburan ini adalah kritikal bukan hanya untuk menyokong pertumbuhan segera, tetapi juga meningkatkan potensi pertumbuhan masa depan Malaysia.

"Pelaksanaan projek pemangkin seperti diumumkan di bawah Fasa 1 NETR juga memberikan sokongan kepada pertumbuhan pada jangka masa sederhana," katanya.